

SANDE 3 BILONG LEN

(rem (Ol i nil daun na pre liklik)

1. RIT

Eks 3:1-8, 13-15

Akar dapanim: E Israelia mikim suam, Ki Uabi ki Godin iziam. A ia bagha na amadazi ki ize.

Akar kam, a Ua Me Inimin Akinafarim, o Eksodas, an aven iti.

Dughiar mamin Moses uan amerem Jetron sipsipba ko memebagh eghuva, da inigha gumaziba puvatizir danganir mamin ghua, a ifagha vongin ghua Horepin oto, kar God baghavira itir mighsiam. Horepin mighsiamin ziar igharazim, Sainai. Ezi Ikiavira Itir Godin ensel temer otevir mamin aguabar tongin avir mizariabar min a bato. Ezi Moses temer otevir kamin gari, avim isia daforofogha egha temem isir puvati. Ezi Moses aguaghfagha ghaze, “Kar bizir igharazim! Tizim bagha temer kam isir puvati? Ki roghira mangi an ganigham.”

Ikiavira Itir God, Mosesin gari a roghira izima, God tememin aguabar tongin ikia an dia, “Moses! Moses!” Ezi Moses a ikara, “Ki kati.”

Ezi God ghaze, “Ni roghira izan marki! Nguazir ni isin tughav tir kam, kar anogoroghezir nguazim, a nan nguazimra. Kamaghin ni uan dagarir asuaba suegh.”

Egha God ua kamaghin migei, “Ki nin afeziamin God. Egha uaghan nin inazir afeziaba, Abraham, Aisak ko Jekop, ki men God.” Ezi Moses Godin akam baregha, an ganan atiatigha uan guam avara.

Ezi Ikiavira Itir God kamaghin a migei, “Ki guizbangira gari, nan

gumazamiziba Isipin kantrin ikia, men ikirimirim bar ikufi. Egha ki me barazi, me ingangarimin garir gumazir kurabar atiatia, nan akurvazim bagha arai. Ezi ki bar men osimtizibagh fogha men apangkufi. Egh ki Isipian dafarim da ua me inigh men akuraghasa izaghiri. Egh Isipian nguazimin men aku, nguazir ekiar aghuimin mangam, nguazir kam a bar dera, ezi biziba bar deragha an ikiava aghui. Nguazir kam, Kenania, Hitia, Amoria, Peresia, Hivia ko Jebusia, datirighin a gapiaghav iti.

Ezi Moses kamaghin a ikara, “Ki Israelia bagh mangi me mikim suam, ‘Ian ovavibar God ia bagha na amada,’ eghti me nan azaragham, ‘An ziam tina?’ Eghti ki manmaghin me mikimam?”

Ezi God Moses migia ghaze, “Kirara, Ki Uabi Ki Kamaghira Iti. Ni kamaghin me mikim, ‘Kirara Ki Uabi, kar Godin ziam, egha a ia bagha na amada.’ ”

Egha God ua kamaghin Moses migei, “Ni kamaghin Israelian gumazamizibav kim, ‘Ikiavira Itir God, a ian ovavibar God, an Abraham ko Aisak ko Jekopin God, a na amadazi, ki ia bagha izi.’ Ziar kam, Ikiavira Itir God, a zurazurara nan ziam, ezi gin otivamin boriba ziar kamra na dipon.

Kar Godin Akam.

SAM

Sam 103:1-4, 6-8, 11

Ia akam ikaragh: Ekiam, apangkuvim zurara en iti.

Ki Ikiavira Itir Godin ziam fam.

Ki uan duam ko, navir averiam ko, namnamin, bar Ikiavira Itir Godin ziar aghuim pirafam!

Ki Ikiavira Itir Godin ziam fiva,

bizir aghuir a na gamiba da bakinighnighan kogham.

Ia akam ikaragh: Ekiam, apangkuvim zurara en iti.

A nan arazir kuraba bar da gin amaga,

nan arimariabagh amizi, da ua dera.

A nan akuragha ua na inizi,

ki ovengezir puvati.

A bar na gifongegha bar nan apangkufi.

Ia akam ikaragh: Ekiam, apangkuvim zurara en iti.

Ikiavira Itir God ingangarir aghuim gumazamizibar akurvaghasava a gami.

Men marasi faragha gumazir arazir kurabagh amibar apengan ikia gavgaviba puvati.

Ezi a bar men akuragha deragha me gamizi me deravira iti.

Bar fomira, a uan araziba, da isa Mosesin aka.

Egha Israelia, a ingangarir gavgavir kaba men tongin dagh amizi me dar gani.

Ia akam ikaragh: Ekiam, apangkuvim zurara en iti.

Ikiavira Itir God en kuarkuva an apangkuvim en iti.

A bar e gifueghavira ikia, bemirama en atarir puvati. Gumazamizir an atiatia an apengan itiba, a bar men apangkufi.

A men apangkuvir ababanim, a bar ekefe, mati an overiamin pin ikegha zaghira nguazimin tu.

Ia akam ikaragh: Ekiam, apangkuvim zurara en iti.

2. RIT

1 Ko 10:1-6, 10-12

Akar dapanim: Gumazir Mosesin adarazir eghaghaniba osiriziba, nighnizir aghuiba e daningasa da osiri.

Akar kam, akinafarir faragha zuim, Pol Korinin gumazamiziba baghava an osirizimin aven iti.

Nan adarasi, ia kamaghin foghasa ki ifonge. Mosesin dughiamin, en ovaviba bar ghuariar God tuavimin men akakazimin apengan iti. Ezi me bar deravira Retsin Dipam abigha ghue. Egha me bar ghuariam ko ongarimin rurim ini, ezi rurir kam me gamizima, me Mosesin gin aruir gumazamizibar otifi. Egha me bar moghira dagher God me ganingiziba ame. Egha me bar

moghira dipar God me ganingiziba ame. God dagiar me ko aruim gamizima, ezi dipam an ikegha otivaghirima, me aneme. Ezi dagiar kam, a Kraiss uabi.* Ezi God gumazamizir kabar aviriba, men arazibagh ifongezir puvati. Kamaghin, God me misuagharigha, men kuaba pura tintinimin danganir dipaba puvatizimin pura da kavamangi.

Ezi arazir me amizir kaba, da mati nedaziba, e dar ganigh ua men min bizir kuraba bagh naviba dikavan kogham.

Egh ia God gimoman marki, mati men marazi amizi, Ovevemin Ensel iza me misoghezi me ariaghire.

Bizir me batozir kabanagh, da mati nedaziba, eghti gumazir igharaziba dar ganam. God kamaghin ifonge, a nighnizim e datirighin itir gumaziba

danighti, e deraghvira uari bagh ganam. Kamaghin amizi, gumaziba fomira eghaghanir kaba Godin Akinafarimin e bagha da osiri. Dughiar e itir kam, kar nguazim givamim dughiar abuananam.

Kamaghin, gumazitam suam, ki tugha gavgafi, a deragh gan, egh iran marki.

Kar Godin Akam.

WELKAMIM GUTNIUS

Ekiam Krai Iesus, e nin iziam fa iziar ekiam ni ganidi.

Ekiam ghaze, 'God bizibagh ativagh dar ganamin dughiam a roghira izegha gifa, ezi ia uan navibagh iragh."

Ekiam Krai Iesus, e nin iziam fa iziar ekiam ni ganidi.

GUTNIUS

Lu 13:1-9

Akar dapanim: Ia navibagh raghan koghti, osimtizir magh garir kamira bar moghira ia bativam.

Ia, Krai Iesusin Akar Aghuir Luk osirizim, a baragh.

Ezi dughiar kamin gumazir maba ikiava Galilin gumazibar gun Iesus migei, Pailatin midorozir gumaziba me misoghezima men ghuziba God bagha tuer asizibar ghuziba sara verevere. Ezi Iesus men akam ikara, "Galilin gumazir kaba kamaghin ariaghire. Kamaghin amizima ia ghaze men arazir kuraba Galilin gumazir igharaziba bar men arazir kurabagh afira? Ezi ki guizbangira ia migei, bar puvati! Egh ia navibagh iraghan koghiva, ia uaghan bar arimighregham. Egh ia uaghan bizir kam ginighnigh, 18 plan gumazir Siloamin dagiar dipenim dipirigha me misoghezima me ariaghire. Ezi ia ghaze, men arazir kuraba bar Jerusalem itir gumaziba men arazir kurabagh afira? Ezi ki guizbangira ia migei, bar puvati. Ezi ia

navibagh iraghan koghiva, ia uaghan bar arimighregham."

Ezi Iesus akar isin zuir kamin me migei, "Gumazir mam temer figh uan wainin azenimin anekaragha eggha ghuava oviziba bagha an gara tamin apizir puvati. Eggha a wainin azenimin garir gumazim kamaghin a migei, 'Ki 3 plan azenibar arua izava fighin oviziba bagha garava avenge, da bar puvati. An okegh! Manmagh sua a puram aghui?"

"Ezima a kamaghin a migei, 'Ekiam aneteghtima, an azenir tam uam an ikitima, ki an povimin nguaziba a darightima a dagher aghuiba iniam. An azenir munamin beghti, deragham. Puvatightima ni na mikemeghtima ki an okegham.' "

Kar, Krai Iesusin Akar Aghuim.

